

## Transkription von Urkunde MGD 1301a

Ort, Datierung: Magdeburg, 1301-07-18

Signatur: Stadtarchiv Burg, K2, unverz. 13

Inhalt: Ertzbischoff Borchardus: Bürgerrecht

---

Priüilegiu(m) disser Stad van den je(n)nen dÿ jn disse Stad wonen /

Jn no(m)i(n)e d(omi)ni Amen Borchardus von godesgnaden Ertzbischoff der hilgen kerken  
magd(eborch) Allen cristen / luden entbedet sine(n) grud Nach dem der lude dechnisse krangk is  
vnd(e) de Ståd der tijd bÿ den / tÿdlik(e)n guder(e)n vnstede , wurv(m)me to beter beuestinge an  
werken vnd vor handelinge dede wontlik(e)n / vnd mit macht geschen sindt . hebben wij toflucht to  
seker tuchnisse der schrift als wontlik ÿs / hir v(m)me don wÿ kÿnt vnd(e) openbar allen luden disser  
jegenwerdige(n) vnd(e) ok toku(n)pstigen / tyden , dat wij von eyndrechtliker fulbort aller vnd(e)  
besunder(e)n vnser gantzen Capittels , / vnser Borger(e)n to Borgh disse gnade vnd(e) fryheÿt hebben  
gegheue(n) vnd(e) geue(n) mit Crafft / disses briues wat en jowelk . dat sÿ Rydder edder frouwe . edder  
prester edder dener / dede in vnse Stad Borgh . bliuen edder wone(n) wil de sulue schal dar Borger  
werden / also . nemlik(e)n . dat he in der suluen Stadt sitten vnd(e) sik holden to allen rechticheyden  
der / gn(an)t(e)n Stad Borgh . welke rechticheide to dÿde Stadrecht genommet sindt vnde willen / ok  
nemlk(e)n dat de vorbenomede Stadt Borgh vnd(e) Borger(e) dar sulues sik frouwen vnd(e) / gebrÿken  
schullen der selingen rechticheyden vnd(e) fryheÿden . der sik de sulue(n) Borgere / von anbegynne de  
suluen Stadt wente hÿr to gebrÿket vnd(e) gefrouwet hebben , vor / de sulue(n) gnade vnd(e) friheÿt  
den gn(an)t(e)n Borger(e)n von vns ghegeue(n) , hebben vns de selingen / Borgere twe hundert mark  
Stendalsch suluer gegeue(n) to der wedderlÿsing vnser / Sloten plothe To tuchnisse vnd(e) orekunde .  
vnse vns <sup>1</sup> vnd(e) vnser Capittels ingesegille / an dissen briff sindt gevangen Tÿghe de hir an vnd(e)  
ouer sindt gewesen Rupertus von / mansÿelt vnser kerken kemerer Geuehardus von lindow ,  
Borchardus de Schrapelow / Hinric(us) von grÿneborgh Canonike vnser kerken Richard droste ,  
Heyne von Aluensleÿe / Hermen von werden Eyner genommet von waremestorp , he(n)nigk von  
bardeleue / Tyle masschalk , hans von louborgh Borghgreÿe , heÿne von Rodensee vnse Rydder(e) /  
vnd(e) ok vele andere loffwerdigen Ghegeue(n) to Magd(eborch) Na (Christi) gebort . dusent /  
dryÿhÿndert vnd(e) dar na jn dem irsten jare in der veffteynden kalenden des mane(n) Augusti /

---

<sup>1</sup> durchgestrichen